

**Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2018-imeersoq**  
*Aningaasaqarnermut Naalakkersuisumit saqqummiunneqartoq*

**pillugu**

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Karl Kristian Kruse, Siumut, siulittaasoq  
Inatsisartunut ilaasortaq Sara Olsvig, Inuit Ataqtigiit, siulittaasup tullia  
Inatsisartunut ilaasortaq Niels Thomsen, Demokraatit  
Inatsisartunut ilaasortaq Jess Svane, Siumut  
Inatsisartunut ilaasortaq Mala Høy Kuko, Siumut  
Inatsisartunut ilaasortaq Aqqaluaq B. Egede, Inuit Ataqtigiit  
Inatsisartunut ilaasortaq Tillie Martinussen, Suleqatigiissitsisut

**Siunnersuutip imarisaa siunertaalu**

Aningaasarsianit akileraarutit pillugit inatsisip allanngortinneqarnissaanik siunnersuutikkut matumuunakkut inatsit arlalitsigut allanngortinneqassasoq Naalakkersuisut siunnersuutigaat:

**Siunnersuummi § 1, nr. 1 pillugu:**

Inatsisartut inatsisaat naapertorlugu sermimik imermillu niuerneramik tunngaveqartumik atuisinnaanermut akuersissummik pigisaqartoq, akuersissutaani aalajangersakkat malillugit, aningaasarsianit akileraarutit naapertorlugit akileraartussaajunnaarnissaa aatsitassarsiortut ingerlatseqatigiiffiilluunniit erngup nukinganik atuisut akileraartinneqannginnissaannik § 3, imm. 3-mi periarfissamut atuuttumut ilanngunneqassasoq siunnersuutigineqarpoq. Taamaalillutik akuersissummik pigisaqartut taakku aatsitassanik iluaquteqarnissamut akuersissummik pigisaqartunut imaluunniit nukimmik tunisassiornissamut engup nukinganik atuinissamut akuersissummik pigisaqartunut naligiissinneqarput.

**Siunnersuummi § 1, nr. 2 aamma 11 pillugit:**

Kalaallit Nunaanni soraarnerussutisiaqarnissamut aningaasaateqarfimmi ileqqaakkanit aammalu aningaasarsianit akileraarutit pillugit Inatsisartut inatsisaanni kapitali 4 a malillugu soraarnerussutisiaqarnissaq siunertaralugu ileqqaakkanit iluanaarutit, ingerlatseqatigiiffinit peqatigiiffinnillu il.il. Kalaallit Nunaanni angerlarsimaffeqartunit pissarsiarineqartut, iluanaarutinit akileraarutinit ilaatinneqannginnissaat SISA-p kissaateqarnera naapertorlugu siunnersuutigineqarpoq. Pisuni taakkunani marlunni aktiaatit soraarnerussutisiaqarnissamut ileqqaakkanik aqqissuussinermut katersorneqartut, tasanilu iluanaarutisiat soraarnerussutisianit iluanaarutinit akileraaruserneqartut pineqarput. Pisuni taakkunani marloqiusamik akileraarusiinnnginnissaq pingaartinneqarpoq.

Aalajangersakkap nassatarisaanik ingerlatseqatigiiffiit soraarnerussutisiaqarnissaq siunertaralugu nunatsinni ileqqaakkanut imaluunniit nunatsinni soraarnerussutisiaqarnissamut aningaasaateqarfimmut iluanaarutinit tunniussisut, tunniussinermi iluanaarutinit akileraarutinit unerartitsissapput. Aningaasarsianilli akileraarutit pillugit Inatsisartut inatsisaanni § 90 malillugu soraarnerussutisiaqarnissamut aningaasaateqarfik aningaaserivilluunniit soraarnerussutisiaqarnissamut ileqqaagaqartoq sinnerlugu iluanaarutinit akileraarutit akilerneqartut utertinneqarnissaat akileraaruseriffimmut qinnutigisinnaavaa. Aningaasat utertinneqartut soraarnerussutisiaqarnissamut aqqissuussamut ikineqartassapput.

**Siunnersuummi § 1, nr. 3 aamma 4 pillugit:**

Inuussutissarsiutigalugu aalisartut aammalu inuussutissarsiutigalugu takornariartitsinermik angallammillu attartortitsinermik ingerlataqartut aquuterammik pisinermi akimik ingerlaannartumik nalikilliliinissamik periarfissinneqarnissaat siunnersuutigineqarpoq.

Tamanna inuussutissarsiummik ingerlatsisumut ukiumi pisiaqarfiusumi akiliisinnaassutsikkut iluaqusiissaaq, tamatuma nassatarimmagu ukiumi pineqartumi aningaasarsiat akileraarutaasussat naatsorsorneqarneranni aquuterammik pisinerup akiata tamakkiisumik ilanngaataasinnaanera. Taamaasilluni ukiumi siullermi akileraaruteqarneq tamatuma annertoqataanik annikinnerussaaq. Ingerlatsinermut atortunik pisinermi akiliutit 100.000 kr.-it tikillugit annertussuseqartut namminersorlutik inuussutissarsiortunit tamakkiisumik nalikillilivigineqarsinnaanerat allanngortinneqanngilaq.

Akiliisinnaassutsikkut pitsanngoriaatip inuussutissarsiummik ingerlatsisup angusaata inuussutissarsiummik ingerlatsisup assersuutigalugu motoorip aserornerani sukkanerusumik aquuterallasinnaanera siuarsarsinnaavaa, taamaasilluni piffissat inuussutissarsiummik ingerlatsisup aalisarsinnaangiffii ilaasunilluunniit angallassisinnaangiffii sivikillisinneqarsinnaallutik. Taamaalilluni inuussutissarsiutigalugu aalisartut piffissamik aalisarfiusumik aalisarneqarsinnaasunillu pitsaannerusumik pissarsiaqarnissaa aalajangersakkakkut siuarsarneqarsinnaavoq.

**Siunnersuummi § 1, nr. 5 pillugu:**

Taamaattumillu Uummannap eqqaani ulloq 18. juni 2017-imi pinngortitamik ajunaarnersuaqarnerani innuttaasunut eqqugaasunut Namminersorlutik Oqartussat taarsiiffigineqartumut akiliuteqarnissamik piumasaqaatitaqanngitsumik taarsiissuteqarnerminni ataasiaannartumik tapiissuteqarnerat akileraarutaassanngitsoq siunnersuutigineqarpoq.

**Siunnersuummi § 1, nr. 6-10 pillugit:**

Illuatungeriit attuumassuteqanngitsut akornanni niuernissamut § 36 a-mi pisussaaffik aamma illuatungeriit tamarmik Kalaallit Nunaanniittut akornanni nuussinernut aamma atuuttoq aningaasarsianit akileraarutit pillugit Inatsisartut inatsisaata nr. 12, 2. november 2006-imeersup allanngortinneqarneranik Inatsisartut inatsisaat nr. 18, 26. juni 2017-imeersukku erseqqissarneqarpoq.

Nakkutigisaasumik aningaasanik nuussinerit taamaattut pillugit paasissutissat nammineq nalunaarutigineqarnissaannut, uppersaasarnissaannut toqqortarineqarnissaannullu § 36 b-mi pisussaaffik taamaallaat atuuppoq illuatungerisamut nunami allamiittumut nakkutigisamik aningaasanik nuussinermi. Illuatungeriit tamarmik Kalaallit Nunaanniittut akornanni nuussinernut pisussaaffiup tamatuma aamma atuunnissaa siunnersuutigineqarpoq.

Aalajangersakkat § 36 a naapertorlugu nakkutiginninnerup pitsaassusaata qulakkeernissaanut pingaaruteqarput. Akileraaruseriffiup sulianik qaqilerinissamut tunngavissaqarneris pillugu nalilersuinissamut periariarfissaqarnissaa malittarisassakkut qulakkeerneqarpoq.

Taamaalillunilu nunami namminermi nakkutigisanik nuussinernut tunngatillugu akit atugassarititaasullu attuumassuteqanngitsumit aalajangersaavigineqarsimanerannik uppersaqaqqullugu suliffeqarfik qinnuigineqarsinnaavoq.

§ 36 b-mi paasissutissiisussaatitaanerup nassataraa akileraartussaatitaasup nammineerluni nalunaarsuinermini suliffeqarfissuarmut atasunik nunani allani ingerlatseqatigiiffinnut il.il. niuernikkut aningaasaqarnikkulluunniit nuussinerit (nuussinerit nakkutigisat) suunerannik annertussusaannillu paasissutissiisussaanera, tassunga ilanngullugit attuumassuteqarfittut illuatungerisanut paasissutissat. Suliffeqarfinnik erseqqinnerusumik misissuiffigineqartussatut kissaatigineqartunik toqqaanissamut akileraaruseriffiup ikiorsiissutitut sakkussaqartinneqarnissaa siunertaavoq.

§ 36 b naapertorlugu uppersaasiinissamut pisussaaffiup, akileraartussaatitaasup akit atugassarititaasullu qanoq aalajangersarneqarsimanerat pillugu allakkatigut uppersaasersuutiniq suliaqarnermik toqqortaqaarnissamillu pisussaaffeqarnera nassataraa.

Illuatungeriit attuumassuteqanngitsut akornanni (attuumassuteqannginnissamik periuseq) nuussinerit naammassineqareerneranni anguneqarsimasinnaasut naapertorlugit akit atugassarititaasullu aalajangersarneqarsimanersut nalilersuinissamut tunngaviusinnaanngorlugit allakkatigut uppersaasiarineqartut suliarineqarsimassapput.

Tamanna tunngavigalugu suliffeqarfiit minnerusut nuussinerit ilaannaannut uppersaasiornernik taamaallaat suliaqartussanngortillugit uppersaasiinissamut pisussaaffiup killilerneqarnissaa siunnersuutigineqarpoq. Suliffeqarfinnut minnernut killiliinissamik siunnersuut uppersaasiisussaatitaanermut taamaallaat atuuppoq.

§ 36 b-mi allannguutit ilaatigut OECD-p BEPS-imik suliniummini transfer pricingimik uppersaasiinermi piumasaqaatinik assigiissaakkanik atulersitsinissamik kaammattuuteqarneranut atatillugu isigineqassaaq. Malittarisassat ilaasa assigiissarnerat akileraartarnermik ingerlatsivimmut nunatsinnilu suliffeqarfinnut iluaqutaasussatut nalilerneqarpoq. Kalaallit suliffeqarfiutaat nunani allani ingerlataqartut, tassani EU kiisalu OECD-mi nunat allat ilanngullugit, piumasaqaatinik taakku assinginik amerlasuutigut piumasaqarfigineqartassapput. Taamaammatt Kalaallit Nunaanni suliffeqarfiit piumasaqaatinik assingusunik assigiiaanik nakkutigisamik nuussinerni uppersaasiinernut atatillugu nunani allani taakkunanisulli piumasaqarfigineqartassapput.

Nakkutigisanilli nuussinernut uppersaasersuinissamik piumasaqaatit annertusineri inuussutissarsiortunut pisarissersuissapput suliffeqarfinnullu aningaasartuuteqarfiussallutik. Taamaammallu maleruagassanik suliffeqarfiit angissusaannut naapertuuttumik uppersaasiisarnermik piumasaqaatinik killiliisunik atulersitsisoqarnissaa siunnersuutigineqarpoq. Assersuutigalugulu danskit akileraartarnermik nakkutilliinerannut inatsimmi, EU-p maleruagassaanik aallaaveqartuni, killiliinerit taamaattut aamma atortinneqarput.

Naalackersuisut uppersaasiinernut maleruagassanik erseqqinnerusunik aalajangersaasinnaanissaat siunnersuutigineqarpoq. Maleruagassanik aalajangersaanermi killissat pingaarnertit tassaassapput OECD-p transfer pricing pillugu maleruagassai. Maleruagassiinermi akileraartussaataasup allaffissornikkut naapertuutinngitsunik nammakkorsoneqannginnissaa eqqumaffigineqassaaq – akileraaruseriffiup akit atugassarititallu attuumassuteqannginnerup nalilernissaanut paasissutissat pisariaqartut kisiisa piumasarisariaqarpai – taamaattoq akileraartussaataasooq atortussianik taamaallaat akileraarusiinissami atugassanik suliaqartariaqarsinnaavoq. Maleruagassanik aalajangersaanermi ilanngullugu suliffeqarfiit assigiinngitsuunerat, taamaalillunilu eqaatsumik periuseqartariaqarneq eqqarsaatigineqartariaqarpoq.

Illuatungeriit attuumassuteqanngitsut akornanni (attuumassuteqannginnissamik periuseq) nuussinerit naammassineqareerneranni anguneqarsimasinnaasut naapertorlugit akit atugassarititaasullu aalajangersarneqarsimanersut nalilersuinissamut tunngaviusinnaanngorlugit allakkatigut uppernarsaasiarineqartut suliarineqarsimanissaat inatsisitigut piumasaqaataavoq. Piumasaqaat taanna maleruagassanik nutaanik aalajangersaanermi ersersinneqassaaq.

### **Siunnersuutip Inatsisartunit siullermeerneqarnera**

Siullermeerinninnermi siunnersuut taperserneqarpoq, tamatumani pineqarlutik sermip erngullu iluaqutigineqarneranni akileraarusiisarnermut maleruagssat allannguutissaattut siunnersuutit, soraarnerussutisiassat akileraaruserneqartarnerannut malittarisassat allanngornerat, aquuteralaat nalikillilernerneqartarnerannut maleruagassat, ajunaarneruarnut atatillugu ikiorsiissutit akileraaruserneqartannginnissaat kiisalu OECD-p kaammattuutai naapertorlugit maleruagassanik aalajangersaanissamut Naalakkersuisunut piginnaatitsinissaq.

### **Tusarniaaneq**

Siunnersuut tusarniaanermut akissuteqarnissamut 17. juli 2018-imut killiliilluni ulloq 12. juni 2018 tusarniaassutigineqarsimasoq Naalakkersuisut paasissutissiissutigaa. Kiisalu tusarniaanermut akissuteqarnissamut 10. augustimut killiliilluni siunnersuut iluarsisaq ulloq 13. juli tusarniaassutigineqarpoq.

Kalaallit Nunaanni aningaaserivinni soraarnerussutisiaqalernissamut ileqqaakkanit aammalu Kalaallit Nunaanni soraarnerussutisiaqarnissamut aningaasaateqarfinni ileqqaakkanit ingerlatseqatigiiffinnit iluanaarutitut tunniunneqartut akileraaruserneqartarnerat pillugu maleruagassat assigiinnginnerat ilaatigut Soraarnerussutisiaqalernissamut Aningaasaateqarfiup SISA-p tikkuanera tunngavigalugu siunnersuut saqqummiunneqartoq ataatsimiititaliap maluginiarpaa. Tassunga atatillugu ataatsimiititaliamit maluginiarneqarpoq SISA-p tusarniaanermut akissummi nuannaarutigigaa inatsimmik atuuttumik iluarsinissamik SISA-p kissaateqarnera siunnersuuteqarnermi inatsisiliortup akuersaaraa kiisalu tusarniaanermut atatillugu inatsisissat siunnersuummi saqqummiunneqartumi allanik allannguuteqartitsinissaq soraarnerussutisiaqalernissamut aningaasaateqarfimmit kissaatigineqanngitsoq.

### **Siunnersuutip aningaasaqarnikkut kingunerisassai**

Iliuusissat arlallit assigiinngitsut siunnersuutip imarimmagit, taakku matuma kinguliani ataasiakkaarlugit sammineqarput:

Kalaallit Nunaanni soraarnerussutisiaqalernissamut aningaasaateqarfiit iluanaarutininik tigusinermut atatillugu iluanaarutininut akileraarutit ingerlatseqatigiiffinnut Kalaallit Nunaanni angerlarsimaffilinnut tunngasut utertinneqarsinnaanerat pillugu aalajangersagaq ataatsimut

isigalugu Nunatta Karsianut annikinnerusumik iluanaarutaassasoq naatsorsuutigineqartoq Naalakkersuisut paasissutissiissutigaaat. Tamatumunnga pissutaavoq allannguutip nassatarimmagu iluanaarutinit akileraarutinit iluanaarutit akinnerunerat, taakkulu soraarnerussutisiaqalernissamut iluanaarutit akileraarutaannit iluanaaruteqarnerunermi ilaannakortumik matussuserneqarput, tassa kingullertut taaneqartut appasinnerusumik akileraarusersorneqarmata.

Tassunga atatillugu ungasinnerusoq isigalugu iluanaarutissaraluit annaasat qanoq amerlatigissanersut missingerneqarsinnaanngitsut Naalakkersuisut oqaatigaat, tassami qanoq annertutigisumik aningaasaliisoqassanersoq kiisalu aningaasaliissutit taakku soraarnerussutisiaqarnissamut aningaasaateqarfinnut qanoq iluanaaruteqaataassanersut apeqqutaassamat.

Aquuteralaat ingerlaannartumik nalikillilernerneqarsinnaanerannut tunngatillugu inuussutissarsiortunut, siunnersuummi pineqartunut, tamanna ukiumi aquuterlassiffiusumi tigoraaannarnik aningaasaatinut pitsanngoriaataassasoq, tamannali ukiumi tulluittuni nalikilliliissutigisinnaasaasa annikinnerunerannik illuatungilerneqassasoq Naalakkersuisut oqaatigaat. Taamaalillunilu siunnersuut nunatta karsianut annertunerusumik kinguneqartussatut naatsorsuutigineqanngilaq.

Akileraartussaataaanninneq akuersissuummi aalajangersarneqarsimappat sermip erngullu niuernikkut iluaqutigineqarnissaat pillugu Inatsisartut inatsisaat naapertorlugu akuersissutillit akileraartussaataaanninnerat Namminersorlutik Oqartussat akileraarutinit isertitakinnerunerannik nassataqarsinnaavoq.

Siunnersuutip inernerisinnaavaa akuersissutit sukumiinerusumik imarisaat ilusilersornerallu apeqqutaalluni appasinnerusumik qaffasinnerusumilluunniit ataatsimut akileraarusersuineq (government take). Tamatumali qanoq annertutiginnissaa siumoortumik tagginneqarsinnaanngilaq.

Siunnersuummi aalajangersakkat transfer pricingimut tunngassutillit pillugit nakkutigisamik nuussinerit pillugit suliap qaqugukkut misissorneqaqqinnissaa aammalu akileraartussaataasumit annertunerusumik uppersaasarsorneqarnissaa pillugu naliliinissamut aalajangiinissamullu akileraartarnermut ingerlatsivik siunnersuutikkut pitsaaneruserusumik periarfissinneqassasoq naatsorsuutigineqartoq Naalakkersuisut paasissutissiissutigaaat. Nakkutilliineruneq nuussinernillu nakkutigisamik nakkutillineq akileraartarnermut ingerlatsiviup aningaasartuuteqarnerulernissaanik nassataqassasoq naatsorsuutigineqarpoq.

Siunnersuummi aalajangersakkat transfer pricingimut tunngassutillit pillugit Naalakkersuisut Qaqugukkut nakkutigisamik nuussinernik suliat misissorneqarlutillu akileraartussaataasumit annertunerusumik uppersaasiivigineqartarnissaat pillugit siunnersuut akileraartarnermut

ingerlatsiviup aarlerinaatinik naliliinissamut pitsaanerusunik periarfissaqalerlunilu aalajangiisinaaneranik pitsanngorsaassasoq naatsorsuutigineqartoq Naalakkersuisut oqaatigaat. Nakkutigisanik nuussinernut tunngasumik suliniuteqarnerup suliffeqarfiillu, assersuutigalugu niuernerit attuumassuteqannginnissamik periutsit atornagit pisimatillugit, Kalaallit Nunaanni akileraartannginnerannut akiuiniarluni suliniuteqarnerup annertusineqarnera akileraartarnikkut iluanaaruteqarnerunissamik kinguneqassasoq naatsorsuutigineqarpoq. Tunngavissalli pigineqartut tunngavigalugit akileraarutitigut iluanaarnerunissap annertussusissaa erseqqinnersumik naatsorsorneqarsinnaanngikkallarpoq. Nunamit nunamut nalunaarusianik paarlaateqatigiittuarternissaq akileraaruserinermut ingerlatsiviit aningaasartuuteqarnerunerannik nassataqartussatut naatsorsuutigineqarpoq.

Nunami namminermi nakkutigisamik nuussinernik paasissutissiinissamik pisussaaffiup annertusineqarnera inuussutissarsiortunut annertunerusumik pisarissersuutaasussatut naatsorsuutigineqanngilaq. Uppernarsaasiinissamik piumasaqaat kalaallit suliffeqarfiisa uppernarsaasiissutinik suliassaasa annertunerulernerannik kinguneqassasoq naatsorsuutigineqarpoq, taamaammallu aningaasartuuteqarfiunerussalluni. Ilaatigullu qanoq angitigineq aallaavigalugu uppernarsaasiisussaatitaanermi suliffeqarfiit mikisut angisuullu immikkoortinneqarnerannik atuutilersitsineq pissutigalugu siunnersuutip kingunerivaa uppernarsaasiisussaatitaanerup, inatsit malillugu suliffeqarfinnut mikisunut nunani allani suleqatiminnut nakkutigisaasumik nuussisunut atuuttup, qasukkaallatsinneqarnera. OECD-p kaammattuutaanik naapertuuttunik nakkutigisamik nuussinernut uppernarsaasiissutinik atulersitsineq, suliffeqarfinnut annerusunut aningaasartuuteqarnerunissamik nassataqassasoq naatsorsuutigineqarpoq. Suliffeqarfinnulli minnerusunut atuutsitsinnginneq Kalaallit Nunaanni suliffeqarfiit ikittuinnaat annertuumik uppernarsaasiisarnermut nalunaarutikkut aalajangersarneqartussamut ilaanissaannik nassataqartussatut naatsorsuutigineqarpoq.

OECD-p kaammattuutaanut tapiliussatut nunat amerlanerusut nunaminni inatsisini nunamit nunamut nalunaarusiortarnissamik piumasaqaateqalernissaat naatsorsuutigineqartoq Naalakkersuisunit aamma paasissutissiissutigineqarpoq. Taamaattumik suliffeqarfissuit nunani tamalaani ingerlatsisut nunatsinni angerlarsimaffeqartut Kalaallit Nunaat nunamit nunamut nalunaarusianik paarlaateqatigiittarnissamik isumaqatigiissuteqarsimatinnagu, ungasinnerusoq isigalugu nunamit nunamut nalunaarutitik nunani ingerlatsivimmini sanasarnissamik piumasaqaateqarfigineqartalissapput. Piumasaqaat nunatsinni suliffeqarfinnut ataatsimut marlunnulluunniit atuutissasoq naatsorsuutigineqarpoq. Piumasaqaat suliffeqarfinnut pineqartunut aningaasartuuteqarnerunermik nassataqassaaq.

Naalakkersuisut paasissutissiissutigisaattut siunnersuutip immikkoortuisa arlallit aningaasaqarnikkut allaffissornikkullu kingunerisassaateqarsinnerusut siumoortumik aalajangersaaffigineqarsinnaanngitsut ataatsimiititaliap naggasiullugu oqaatigissavaa. Tamatumani pineqarput siunnersuutip nunatta karsianut aammalu inuussutissarsiortunut

pineqartunut sunniutissai. Taamaattumillu ineriartorneq Naalakkersuisunit qanimut malinnaavigineqassasoq ataatsimiititaliamit naatsorsuutigineqarpoq, taamaaliornikkut maleruagassat iluarsiiqqineqarnissaat pisariaqartoq paasinarsissagaluarpat pilertortumik qisuariartoqarsinnaaqullugu. Tamatumani immikkut pineqarlutik nakkutigisamik nuussinerit pillugit uppersaasiinissamut aammalu nunamit nunamut nalunaaruteqartarnissamut siunnersuummi aalajangersakkat.

**Ataatsimiititaliap inassuteqaatai**

Siunnersuut **akuerineqassasoq ataatsimiititaliap isumaqatigiittup** inassutigaa.



Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

---

Karl Kristian Kruse  
Siulittaasoq

---

Sara Olsvig  
Siulittaasup tullia

---

Niels Thomsen

---

Jess Svane

---

Mala Høy Kuko

---

Aqqaluaq B. Egede

---

Tillie Martinussen